

續山東考古錄

杜序

滄州爲古渤海郡濱州爲宋渤海郡蓋兩州皆瀕海瀕海郡濱州隸兩省固與鄉里無殊也滄州葉子佩孝廉淵雅好書好書於輿地之學其所居去余州不二百里而余以官京朝久未之知也樂陵王雲湄太史榮第余甥也與孝廉爲莫逆交咸豐二年春三月余於太史寓所見孝廉所著續山東考古錄太史因爲余述其爲人並云孝廉現計偕在都意欲索余一言弁其書首第以兒子翻爲本科副考官未便枉顧榜發後孝廉匆匆南歸余竊以未得附名其書並一見其人爲恨夏六月

天子軫念克濟災黎

命余往濟州籌辦賑務濟州刺史芸士公祖卽孝廉兄也余下車卽詢孝廉孝廉適省兄來署事畢來謁其人溫文爾雅益歎王甥之言不虛夫輿地之學世所難言余鄉自于氏作齊乘後無繼作者通志 本朝凡兩修春駁皆所不免顧氏亭林作山東考古錄最爲精核惜未能舉通省沿革逐一考訂此孝廉所以續作也余於此素未留意然余家於濱濱之沿革則頗能知之舊謂濱爲古漯沃不知其北境實厭次也舊指今蒲台爲墮縣不知其故城在濱境也是書舉能不沿舊說其所引證與余見適合濱州如是則百五州縣中其糾訛求是皆信而有徵可知也此後重修通志或各府州縣自修其志皆可舉此書爲之

標準不至更承訛襲謬焉則此書繫乎吾鄉掌故者豈淺鮮哉  
孝廉面索序言時余又有江南之役行旅匆遽走筆書此付之  
濱州杜受田序

劉序

崑山亭林顧氏有山東考古錄一卷詞約而覈與日知錄三十  
一卷所言地理之文各不相涉世傳爲預修山東通志遺藁而  
亭林遺書十種亦無之顧氏多未成之書如肇域志自謂未遑  
刪訂望後之人續而傳之是錄蓋亦非全書也滄州子佩孝廉  
究心地理之學二十餘年隨兄芸士先生官山東久芸士先生  
所至孝廉皆得至之學有本原而目所已經又多得實故其語  
亦確往見世之爲地志者類皆足跡不出里閭耳目狹隘又多  
好爲新奇摺摭販鬻附會支離其甚者至曲古人之言以就私  
說而所載古城邑證以今之山川道里方向半與實牴或且雜

以小說旁涉委巷之談以快一時之論此考古之士所必訶不待識者而後知其謬也桐城姬傳姚氏嘗病方志家之言古城邑不考求四面地形遠近堪容置否是以所舉不實欲以漢縣與今地相較爲表而貫他縣沿革於其中東原戴氏善之良以郡縣之設繡壤紛羅代有廢興遷徙靡定必明乎地之不在此境者爲何境然後此境確然而無疑也惜姚氏老且病第爲廬江九江二郡沿革考刊惜抱軒文集中余得其書以姚氏非地理專門之學余亦未嘗一涉藩籬無以證其得失求之海內亦未見有能用此例以成一書者今孝廉以其續山東考古錄見示余方預修青州府志而沿革表實出李明府少白圖手考實

出王明府模山範手因持以就孝廉是正之乃知孝廉是書不  
必用姚氏例而其指實與姚氏相脗合昔姚氏二郡考成恨戴  
氏不及見吾亦恨孝廉是書之成而姚氏不及見尤恨續顧氏  
之書而顧氏之不得而見也芸士先生嘉孝廉用心之專力之  
勤出俸錢刻之濟南孝廉索余言爲序余淺學逡巡無以應命  
今芸士先生遷刺史去孝廉亦將遠別以余雖無學能讀之而  
通其意必欲得余一言余亦自幸附名其書又可藉以自重也  
故不辭而樂爲之序道光三十年端午後一日安邱劉燿椿撰

俞序

志山東者伏琛三齊記晏謨齊地記爲最古其書已佚不傳傳者于欽齊乘六卷而已欽書首尾淹貫有法而爲胡氏糾摘多至百十條則信乎作者之難也自大一統志之創於元人至李

賢輩踵之而有明一統志之編

洪武中命纂寰宇通志其書分八目永樂十六年詔纂天下郡

縣志景泰中修寰宇通志準祝穆方輿勝覽其書皆不傳天順五年始撰一統志

爲後人通志之錐輪

然踏駁紕繆爲人所詬病山東通志舊有陸張二本康熙初重

修方伯施公延顧徵君炎武主其事徵君以同事好立異同爭

之不能得而去此山東考古錄所由作也

王士禛居易錄云舊藏陸鼎儀鈔山東通

志精審不苟新通志修於癸丑當事旣視爲具文秉筆者又鹵莽滅裂不諳掌故如人物一門竟將曹縣李襄敏公秉單縣蔡



襄毅公絃沂州王恭簡公景三鉅公姓至岳濬再修多所考正  
名事實削去不存一字其餘概可見矣

尚未抉剔盡善也滄州葉君子佩隨其兄來歷下端居多暇寡

所嗜好惟肆力於歷算輿地之學其所著埏紘考古錄予已歎

其絕奇比復有續山東考古錄之役誤錄甫畢出以見示讀之

益歎其才大思精爲地志不可少之書也地志始漢書而司馬

彪續後漢書郡國志凡郡縣增省在安順以後者概置不錄唐

修晉書以永嘉爲斷雖何法盛臧榮緒之書具在略未檢及卽

山東論濟南一郡祇存祝阿一縣其餘訛脫可知矣近時洪亮

吉補三國疆域志謂徵炎運則前無所承據金行則後無所據

欲取則劉元而遠闕千祀難以已意增定郡縣蓋其難也如此

紀文達公總校四庫全書嘗言參伍考校唐宋元之志不甚謬  
至明而繆始極通都大邑之志不甚繆至僻邑而繆益極其考  
證詳確者千百之十一耳子佩生千載之後乃能州分部居疏  
通證明凡往籍中關山東地理者舉辨明而訂正之或目驗而  
可信或臆決而難欺思誤書而無鑿空之譏及闕文而存質疑  
之義出其緒餘更爲圖說凡疆域沿革水道變遷罔不考據確  
實使閱者於今昔分合之故了然於胸較若列眉是書是圖足  
以祛千餘載之惑正十二郡之誤斯亦有功於文獻矣子佩幼  
不好弄獨喜深沈之思凡書之號難讀他人經月不能了者一  
二過輒得其解予于乙巳歲始識子佩於歷下所言皆天下偉

人大事恨相得晚子學不逮其十之一然以所志同所趣同每一晤語未嘗不以所學互相質子佩早舉孝廉久困於春官試人皆知其才有用於世而不知其何以用也人苟讀萬卷書其胸中所積而欲發者不於事功則於文章世之貌爲理學經濟之說者人或可以襲取獨其苦心精詣低徊太息而不能名言之故則非志趣同者不足以知之是書在子佩虎之一毛耳然使後之作者溯源窮委從此而隅反之則雖舉天下之地志補正糾彈之不難則此一編也不徒爲考古之權輿地志之通例其爲不可少者豈惟山東一方之書而已哉

道光二十有八年夏五月海鹽俞浩澍持甫譔

孔序

康熙初修山東通志聘顧亭林先生入局是時郡邑之書頗備先生因別爲山東考古錄肇域志二書山川古蹟稍爲刪改願以游蹟閒有未及故不免有遺漏此滄州葉子佩先生續山東考古錄之所由編也竊惟地理之志莫古於禹貢而禹貢記九州之疆域一以山川爲定雖歷代沿革不同城郭遷建不一而考之於山川則不難於指掌乃今之爲郡縣志者率多沿誤承訛其弊卽在狃於山川不知山千古一定不移而川之遷徙不常今古異道必拘以定一郡一縣之四至則有大不相合者無惑乎因山川而移置城郭據古按今輒互相矛盾也子佩先生

慟夫修志者之踵因前失爰周歷各邑稽圖沂源以山定川以川之流證古今之異道而定今郡縣城郭之所在與古相建之處故其爲書博而精約而詳爲亭林先生考古錄之功臣其言曰山東百餘郡縣自漢迄今城不遷名不改者惟歷城掖縣二處則考據之詳核可見也後之讀是書者於山之形勢川之變遷疆域之沿革若網在綱有條不紊而歷古地志之繆忽自不煩言而解矣道光己酉冬孟朔旦曲阜世愚姪孔憲庚謹序於顧廬

自序

余十七歲時讀顧徵君

炎武

山東考古錄輒歎精核得未曾有

而全書僅數十頁竊以太略爲恨自是涉獵之餘凡有關山東地理者輒筆錄而參訂之雖有續貂之想以見聞孤陋未敢也道光十九年芸士兄謁選得山東鄒平縣次年調館陶余皆隨任又幸得身履其地親驗周諮多所裨助思勒爲一編而府縣志尚多未見其所考正或已見於近志則已視爲心得者人或視爲唾餘又遲迴者久之二十五年從兄來歷城浼兄遍索諸寅好方盡得各邑乘而讀之其考證詳明者甚少益歎續山東考古錄之作不可已也爰取所業而排纂之凡四易稿三十八

續山東考古錄

自序

一 蝸角尖廬

閱月而成與顧氏書體例雖殊而志則一也憶兒時屢夢從兄  
登山東會城周覽形勢初不解何兆本年

朝廷有外官不准弟姪隨任之

命而此編適於是時告成爰繕錄清本付兄收存余遂將遵  
功令旋里始恍然昔年之夢竟以是編踐之也從此不獲往來  
齊魯之郊與官斯土者及其邦賢士大夫以質證其錯繆是余  
之不幸卽是編之不幸也夫

道光二十八年夏 月滄州葉圭綬子佩甫識

例言

一顧氏雖以考古名篇實考山東地理之書也特原書卷帙無多故不分門類茲爲分門續纂曰沿革考曰雜考曰山考曰水考所以考地理者略備矣

一地理莫要於沿革亦莫難於沿革近世志乘之誤多由沿革不明他門皆因差謬故茲編考沿革爲最詳

一沿革古蹟地志每分爲二門不知古蹟者沿革之實據也茲考沿革全據其境內故城故城在本境書某代某國某邑某縣故城不在本境而境內確有其地有明證者則加地字境內當有其地無明證者但分註當有某地其無考國邑縣別



爲一卷其他古蹟統入雜考

一三代前分州不同見於總沿革各州縣沿革不復書以與國邑無統屬也漢迄宇文周皆以州領郡故悉書之

一齊魯諸大國其疆域見於總沿革各州縣沿革必其邑有可考者書某國某邑無邑可考不復書諸小國則總沿革不載惟見於州縣沿革

一漢縣大約因秦之舊但秦無地志逕據漢志固不可擇史漢中秦縣有據者書之反嫌挂漏今秦郡惟見於總沿革縣槩從略縣名有與漢異者方書之

一志地之書不論正閏統雖僭竊所改名增省必書非此則沿

革不備也惟新莽所改後漢旋皆復故所改名備載班志各郡縣下無庸復贅後漢因而不改者分注於下

一三國志無地志近洪氏亮吉補三國疆域志不足深據與鄙見不同者未敢附和

一洪氏所補東晉及十六國疆域志想當然者居其半而紕繆尤多近志有據入沿革與正史並列似覺未安山東之地屬東晉之時無多與十六國茲皆從略必其時所建置者書之洪氏之誤附辨於晉代後

一隋書地理志雖亦名五代志而北齊宇文周二代不可考者正多往往今州縣當其時竟不知爲何縣地者姑從闕如

一隋唐州郡屢更其制其更改之年惟見於總沿革州縣沿革不復載惟所改州郡之名古未有者書之

一唐書地志不載方鎮歐陽公曰方鎮兵戎之事非職方所掌故也然五代以後往往以軍目地而沒州郡之名宋以後則徒有虛名第爲州郡美號志地者不可不書矣但唐時藩鎮廢置及所領州郡之分合載於方鎮表者其文實繁今亦備見於總沿革州縣沿革惟書方鎮治所及所賜軍號之年五代下則見於州縣沿革其軍治不在今山東境者附見於總沿革

一隋唐五代宋州郡類可通稱故州郡之名皆並行分書

一既有總沿革各府及直隸州亦當有沿革但已見於總沿革及州縣沿革故不另立專條

一各州縣境內每有古無縣治者但書某縣地不書所統屬已見於其治所所在之州縣也其境內有古縣治又有他縣之不同屬者仍書所統屬防混也境內無古縣治其地所隸之縣不在今山東境者亦書所統屬以其縣治不見於書中也

一凡州郡等治所在此縣書某治某縣不同城者加書治縣之某城其所治城在此縣其縣治不在此縣書某治某城爲某縣地所治在此縣所治之城非今縣地書某治某縣分注治某城今爲某縣地

一元迄明初凡州所治之縣皆廢舊書某縣省入某州夫縣本統於州不得云省入今書廢某縣其地直隸某州於義爲協一凡故城或古未考及或舊說有誤詳載考證之文於下近志所已考及而無誤者則但書去城方向里數間有未查明者闕之俟補

一三代前國邑散見羣書雖無考證之文亦書其始見之書

後世

郡縣各有地志故從略其故城有卽後代縣治者書卽某代某縣

一古國邑惟據經史所載若不見經史僅見於路史等書者附存於考古之後提綱不取

一鹽鐵官無關地理晉宋以後又有鎮戍而土地人民仍歸郡

縣唐宋鎮將統於郡縣復有所謂監者皆不書五代史徐法  
之名不載於地理皇朝始與州府並列按監究無關於地理  
與鹽鐵官等耳九域志金志各縣載鎮凡幾鎮有鎮將也若  
今所謂鎮不過市集之場商賈所萃問有分防佐職官亦屬  
無幾洪亮吉乾隆志各州縣亦仿九域志書鎮凡幾可謂泥  
古不惟明代衛所與府州縣分地而治其廢置附州縣後有  
通者不同城者亦書其故城

一 凡徙治在本境內者提綱不書不在境內則書今爲境內古  
本兩縣亦書古今皆一縣徙治後又於故城別置縣亦書

一 古國邑郡縣外古城尚多凡城堡鄉鎮村里見於前史者皆  
考古者所當知也作雜考一卷漢侯邑無考者附後

一 山水考不能遍及各有專例見本門

一一統志通志府州縣志不無錯誤州縣志地近則考訪易苟能詳審府志通志皆可仰成而一統志又通志以下所取法者也茲於各州縣沿革後其志中沿革古蹟二門之誤皆爲摘駁別作一統志辨誤二卷府志通志之誤則散見各條

一聞見孤陋難免遺誤誠有如朱氏竹垞所云中間滲漏隨覽隨悔者各府州皆補遺於後

一此編旣續顧氏之書凡見於山東考古錄及日知錄者統書詳前錄有鄙意未安者亦不敢從同

一稱引較多之書須知其人與世書名或略節字數以省煩文備列於此 歷代正史地志

漢曰漢志晉曰晉志餘倣此惟宋書州郡志稱劉宋志以別也

宋後魏曰魏志不嫌混入曹魏者彼魏字上有三國字樣也春秋釋地晉杜預作水經注

後魏郟道元括地志唐魏王泰作稱原名元和郡縣圖志唐李吉甫作

太平寰宇記宋樂史作稱寰宇元豐九域志宋王存作通典宋孫樂篋校勘

唐杜佑作稱原名續通典宋宋白作文獻通考宋馬端臨路史宋羅

稱原名續文獻通考明王圻作齊乘元于欽作稱原名禹貢錐

指國朝胡渭讀史方輿紀要國朝顧祖禹四書釋地國朝閔

稱原名補三國疆域志國朝洪亮吉作稱補東晉疆域志補

十六國疆域志其乾隆府廳州縣志大抵原本



續山東考古錄目次

卷首

圖考

總沿革

卷一

濟南府沿革上

歷城 章邱 鄒平 長山

卷二

濟南府沿革中

淄川 齊東 齊河 濟陽 德州

卷三

濟南府沿革下

德平 禹城 臨邑 平原 陵縣  
長清

卷四

東昌府沿革上

聊城

堂邑

博平

茌平

清平

卷五

東昌府沿革下

莘縣

冠縣

館陶

恩縣

高唐州

卷六

泰安府沿革上

泰安

新泰

萊蕪

肥城

卷七

泰安府沿革下

東平州

東阿

平陰

卷八

武定府沿革上

惠民

青城

陽信

海豐

卷九

武定府沿革下

樂陵  
霑化

商河 濱州 利津 蒲臺

卷十

臨清直隸州沿革

本州 武城 夏津 邱縣

卷十一

登州府沿革上

蓬萊 黃縣 福山 棲霞 招遠

卷十二

登州府沿革下

萊陽 海陽 寧海州 文登 榮成

卷十三

萊州府沿革上

掖縣 平度州 昌邑 濰縣

卷十四

萊州府沿革下

膠州

高密

卽墨

卷十五

青州府沿革上

益都

博山

臨淄

博興

卷十六

青州府沿革中

高苑

樂安

壽光

卷十七

青州府沿革下

昌樂

臨朐

安邱

諸城

卷十八

兗州府沿革上

滋陽

曲阜

寧陽

鄒縣

泗水

卷十九

兗州府沿革下

滕縣 嶧縣 汶上 陽穀 壽張

卷二十

沂州府沿革上

蘭山 郟城 費縣

卷二十一

沂州府沿革下

莒州 沂水 蒙陰 日照

卷二十二

曹州府沿革上

荷澤 曹縣 定陶

卷二十三

曹州府沿革中

鉅野 聊城 單縣 城武

卷二十四

曹州府沿革下

濮州

范縣

觀城

朝城

卷二十五

濟寧直隸州沿革

本州

金鄉

嘉祥

魚臺

卷二十六

無考國邑縣

卷二十七

雜考

卷二十八

山考

卷二十九

水考一

卷三十

水考二

卷三十一

一統志山東沿革辨誤

卷三十二

一統志山東古蹟辨誤

續山東考古錄卷之首

滄州葉圭綬子佩甫述

山東布政司總沿革

古青州及兗州南境徐州北境豫州東北隅

舜十二州此不改

殷改青

州爲營州

禹貢海岱惟青州蓋東與東北皆至海南至岱西與西北至濟不言濟者見於兗州也今山東實有青州全境經文簡明本無可疑自漢馬鄭諸儒創爲舜分青州爲營州之說謂禹貢青州越海有漢遼東及朝鮮三韓之地遂有訓孔傳據海爲跨海者禹貢雖指力駁訓據爲跨之說獨於青州謂其可



通余竊有疑焉九州分界皆因山川之自然江淮河濟尙無一州跨兩岸者况大海乎諸儒所據惟爾雅齊曰營州一語考講家以爾雅九州爲殷制第以與禹貢周禮皆不同殷制無考其說自可從若舜之十二州惟幽州見於書并州營州乃後人以見於爾雅周禮者湊足其數又以周禮幽州山鎮爲醫無閭已盡漢遼西之境無處可容營州遂爲分青爲營之說屬之遼東持其說者競以周幽州跨海有古青州地證青州亦可越海有遼東究之周幽州與所有青州地實陸地相連詳下並非越海甚有以漢末公孫氏據遼東越海收東萊地明遼東都指揮司屬山東爲證者何足據乎夫經文明言

海岱惟青州如果越海有地則海在其域內不足舉爲限界如仍至於海耶今盛京東北厯吉林寧古塔又東北盡使犬使鹿之邦遠者五六千里近者亦二三千始極於海謂皆古青州地豈不令人駭笑儻不至於海耶則經何以云海岱惟青州胡氏獨謂青州跨海爲可通者以他州一訓爲跨則疆域混淆動多齟齬遼東非九州限內跨而有之不至混入他州故耳然獨不自嫌矛盾乎又考嶠夷旣畧濰淄其道萊夷作牧正治青州自東而西次第胡渭又以先濰淄後萊夷爲疑不知古濰淄水側皆有萊夷

詳黃縣高密萊蕪臨朐

萊邊營邱則

濰淄不治萊夷無作牧之理舊說誤以黃縣爲萊都遂謂今

登萊二府皆古萊夷謂嶠夷爲今朝鮮考孔傳稱嶠夷爲東表之地正義曰青州之東界外之畔爲表故云東表之地夫界外之畔並非海外之畔春秋時萊夷滅於齊而齊界不外姑尤卽謂姑尤爲界無不可謂此外皆嶠夷亦無不可後人以青州東極於海因謂界外爲海外則是禹治青州先越海而治今朝鮮又越海而治濰淄似無此理况殷末箕子罔爲臣僕所適必從古未隸中國之方嶠夷爲唐虞以來版圖內地箕子適此安見罔爲臣僕哉因學紀聞引薛氏說以登州爲嶠夷最爲允當

寰宇記以密州爲嶠夷不可從

總之遼東古縱在九州內

亦當屬冀州禹貢冀州島夷卽今朝鮮東南諸島如渤海跨

在青州城內鳥夷無書於冀州之理况東漸於海經有明文

斷無越海之地可知舜誅竄四凶卽其時中土四方極邊之

地而極鯨不越羽山

一說在江南頓榆界一說卽蓬萊之羽山

非東無海外地明

證哉

子虛賦齊邪與肅慎爲鄰右以湯谷爲界秋田乎青邱仿徨乎海外又亡是公曰今齊列東藩而外私肅慎捐

國踰限越海而田按此賦本義在虛夸此又虛夸中之設言非齊真與肅慎鄰有海外地也○領亭林亦謂營州非禹貢九州地闕潛卽劉記據史記舜紀北發息慎駁之但以爲青州所分實與經文不合故未敢曲從詳見余黃紘考古錄

青州之域今登萊二府青州府除博興一縣濟南府之厯城

長清章邱鄒平長山新城淄川是

兗州南境今濟南府之齊河濟陽臨邑禹城平原陵縣德平

齊東德州曹州府之菏澤

禹貢菏澤屬豫州今以名縣實兗地

濮州范縣朝城

郟城兗州府之陽穀壽張青州府之博興東昌武定二府臨  
清一州是

徐州北境今沂州泰安二府兗州除陽穀壽張二縣曹州府  
之鉅野城武單縣濟寧一州是

豫州東北隅今曹州府之定陶曹二縣是

周青州兗州南境幽州東南境豫州東北隅春秋爲齊國齊地有在

今直隸者漢志齊有渤海之高樂高成二縣魯國魯地有在今江南者漢志魯南有泗水至淮得臨淮之下相睢陵僮戰國爲齊國魯國

又趙魏楚三國地

周青州并有徐州大半周禮青州澤藪曰望諸則西南侵入

豫州其東北割入幽州

子虛賦齊浮渤海游孟諸蓋宋滅後孟諸在齊境也

周幽州川曰河洙浸曰菑時是分有兗州近海之地渤海南

北雖各有幽州地而由今直隸天津府

直沽口卽禹河入海口也其地周屬幽州

南入山東武定府境傍海陸地自相連也舊說幽隔海分青

地失考甚矣

周兗州山鎮曰岱山澤藪曰大野南踰濟有徐州地

春秋齊境今青州府除安邱東境

莒杞地

諸城西境

莒魯地

昌樂

東南境萊州府除濰縣南境

二處杞地

卽墨一縣

今卽墨古夷國在姑尤外

濟

南武定二府東昌府之聊城堂邑博平高唐茌平泰安府之

平陰東阿及泰安萊蕪之北境東平東境肥城南境沂州府

蘭山蒙陰之北境兗州府之陽穀曹州府范縣之中境登州

府之招遠是

在祐水內

戰國時又有兗州府之滕縣南境鄒縣西

境沂州府之莒州沂水日照

三處莒國故地

費縣之南境青州府安

邱東境諸城西境昌樂東南境萊州府之濰縣南境卽墨一

縣曹州府之觀城登州一府 史記樂毅列傳下齊七十餘

城皆爲郡縣是秦之前齊地已曾爲郡縣也

春秋魯境今兗州府之曲阜泗水鄒縣北境寧陽汶上嶧縣

極南爲偃陽國

泰安府之新泰及泰安南境萊蕪南境東平西境曹

州府之鄆城東境鉅野城武東境

郟地初屬宋

單縣又范縣北境

濟寧州本州北中境嘉祥魚臺沂州府之蘭山中南境西境

郟城西境蒙陰南境費縣又莒州北境

郟城屬魯

青州府諸城西

北境安邱西南境是戰國時多有析入齊者費又自爲小國後皆入楚

春秋晉地在今山東者東昌府之館陶冠縣臨清一州兗州府之壽張

古范也

是戰國析入趙

春秋衛地在今山東者今曹州府之濮州觀城朝城荷澤北境東昌府之莘縣泰安府東阿西境是戰國入齊魏

春秋宋地在今山東者今濟寧州之金鄉及魚臺南境曹州

府之城武西境北境曹縣南境是後并有曹國今曹州府之

荷澤中境南境曹縣中境北境定陶是戰國入齊魏

漢志齊得宋之



濟陰東平又云東平須昌壽良皆在濟東  
屬魯非宋地常考按東平戰國或曾入宋

秦齊郡又辟郡後分爲郟郡又琅邪郡東郡碭郡鉅鹿郡泗水

郡邯鄲郡地

泗水一作泗川

秦齊郡漢之齊郡平原千乘濟南北海東萊六郡留川膠東

高密城陽四國

秦漢間有三齊臨淄膠東濟北三國也漢初有四齊齊膠東膠西濟南四國也見漢書五

行志高后時有四齊齊琅邪濟南城陽也見高五王傳景帝時有四齊膠東膠西留川濟南四國也見賈誼傳又有稱六齊者齊濟南留川膠東城陽濟北六國也見鄒陽傳

秦僻郡漢之魯國東海郡 應劭曰漢東海郡秦郟郡魏志

水經注說同獨裴駟史記注所載秦三十六郡無郟郡胡三

省以爲然通考以爲僻分爲郟郡姑從之

秦琅邪郡卽漢琅邪郡

秦東郡漢東郡魏郡

秦碭郡漢山陽郡濟陰郡梁國東平國

秦泗水郡漢沛郡楚國

秦鉅鹿郡漢清河郡渤海郡

秦邯鄲郡漢廣平國 以上凡得秦八郡地計九郡今山東有

齊郡全境薛琅邪二郡十得八九東郡碭郡次之鉅鹿又次

之泗水又次之邯鄲僅南曲一縣而已秦諸郡合以今輿地多難稽考證以漢郡

國參觀州縣沿革可得其大畧齊郡以下第據在今山東境者以漢郡國非謂漢之某某郡國已盡秦諸郡之全境也

漢青州又兖州徐州冀州豫州幽州地又字以下皆非

漢書武紀元封五年初置刺史部十三州小顏注漢書儀云  
初分十三州假刺史印綬有常治所又辭宣朱博傳朱博爲  
冀州刺史行部使從事告敕吏民使者行部還詣治所顏注  
治所刺史所止理事處按後漢志始載刺史治所然據此二  
條則前漢刺史已有常治但多不可考矣

後漢青州又兖州徐州冀州豫州地三國魏同

晉青州又兖州徐州冀州司州豫州地

東晉青曰北青  
州徐曰北徐州

劉宋青州兖州僑冀州又徐州地

劉宋惟有河南地兖州惟得漢州之東半今山東有其全境  
宋書明帝紀泰始四年八月辛卯分青州置東青州以沈文

靖爲刺史沈文秀傳泰始三年以文秀弟文靜統高密北海

平昌長廣東萊五郡軍事由海道救青州至東萊之不其城

宋不其縣屬長廣郡此據往制言之爲虜所斷不得進因保城自固又爲虜所

攻屢戰輒克太宗以爲東青州刺史四年不其城陷文靜見

殺按是時文秀尙守青州拒魏淮北地盡失故文靜由海道

往救不其城旋陷故宋志不載東青州

少帝元年魏圍青州刺史竺夔力守不能

陷魏焚攻具走夔上言東陽城被攻毀壞不可守移鎮長廣之不期城是不其城曾爲青州治蓋暫駐旋復故也

後魏青州齊州

宋僑冀州

濟州

分兖光州

膠州

分漢青徐

南青州

漢徐北

徐州

分徐

又兖州徐州司州

後改爲洛州

冀州滄州

分幽

西兖州

分豫州

東徐州揚州

治己氏之北譙郡屬之

地高齊無揚州地餘同

後魏置東青州南冀州皆旋廢

詳平原聊城

齊書高乾傳魏孝昌

末葛榮作亂以高翼爲渤海太守未幾賊徒愈盛翼部率合境徙居河濟之間魏因置東冀州以翼爲刺史按此州當未久卽罷與東青南冀同而魏志失載治所疑在濟南北境

魏書昭成子孫傳元德贈曹州刺史魏無曹州疑有誤

魏志西兖州孝昌三年置然魏本有西兖州高祐傳云出爲西兖州刺史鎮滑臺蓋本宋兖州舊治後復置於定陶耳紀要稱徙定陶後旋復滑臺未詳所本

宇文周青州置總管府齊州濟州魯州光州膠州莒州

南青州沂州

北徐

又兖州曹州

西兖

徐州洛州冀州滄州魏州貝州

二皆

邳州徐州

地

隋北海郡

本青州罷總管府

魯郡

本兗州

齊郡

本齊州

東萊郡

本光州隋初曰萊州

高密

郡

本膠州隋初曰密州

琅邪郡

本沂州

東平郡

本魯州隋初曰鄆州

濟北郡

本濟州

平原郡

隋初

初

日德

又濟陰郡

本曹州

渤海郡

本滄州

武陽郡

本魏州

梁郡

隋初曰宋州

東郡

隋初曰滑州

兗州

隋志大業二年改兗州當作改東郡

彭城郡

本徐州

清河郡

本貝州

下邳郡

本邳州

地

隋志諸郡後統以禹貢九州舊以爲史官以作綱領非其時

制也但總敘有云煬帝改州爲郡乃置司隸刺史分部巡警

張須陀傳須陀爲齊郡丞破賊司隸刺史裴操之上狀漢制

畿內曰司隸隋都關中齊郡似不能屬司隸或東京亦稱司

隸齊郡屬之歟蓋煬帝時諸郡仍分隸刺史惜部分不可考

唐河南道河北道地

洺州唐志屬河北元和志則屬河東

五代同

唐初於兗州置中都督府齊州置下都督府尋以權重罷之至德後今山東地分隸淄青平盧軍天平軍秦寧軍三鎮又爲義昌天雄昭義宣武武寧五鎮地

淄青平盧軍

至德元載置青密節度使領北海高密東牟東萊四郡治北海郡乾元元年增領滑濮二州二年增領淄沂海三州旋以滑海二州隸汴滑節度濮州隸鄆齊兗節度上元元年復領海州二年并淄沂節度所領淄沂滄德棣五州平盧節度使侯希逸引兵保青州授青密節度使改號淄青平盧

唐書侯希逸傳

肅宗因以希逸爲平盧淄青節度使自是淄青常以平盧增領  
盧寇使據此當稱平盧淄青矣而方鎮表作淄青平盧增領  
齊州鄧景山傳至德初擢拜青齊節度使關播傳亦稱景山  
節度青齊是至德初青密曾領齊州也通志職官景山  
稱淄青節度使誤  
寶應元年登萊沂海泗五州隸兗鄆節度  
人物志亦作青齊

兗鄆旋廢復領五州廣德元年德州隸魏博節度增領瀛州

瀛旋還魏博永泰元年增領押新羅渤海  
方鎮表作兩蕃使  
北海誤

大曆四年析沂密海三州置都防禦使旋廢復領三州十年

增領德州十一年增領鄆曹濮徐兗五州泗州隸永平軍建

中三年廢淄青平盧節度使置淄青都團練觀察使領淄青

登萊齊兗鄆七州治如故置徐兗沂密都團練觀察使  
李洵傳加

洵徐海沂密觀察使正德宗建  
中時事而方鎮表作徐兗沂密  
治徐州興元元年廢徐兗沂



密及曹濮兩觀察使復置淄青平盧節度使領青淄登萊齊

兗鄆徐海沂密曹濮十三州徙治鄆州旋以徐州隸徐泗濠

節度使十四年惟領青淄齊登萊五州還治青州薛平傳李師道平詔

分淄青齊登萊五州爲平盧軍此後始專稱平盧也太和元年以齊州隸橫海軍增領

棣州咸通五年以棣州隸天平軍十三年復領齊棣二州乾

寧三年析齊州置武肅軍防禦使天復元年罷凡領青淄齊

棣登萊六州

天平軍

至德元載置鄆齊兗三州都防禦使治齊州乾元二年升節

度使治兗州增領濮州尋以濮州隸河南節度上元二年以

齊州隸青密節度增領徐州寶應元年增領登萊沂泗海五  
州五年廢兗鄆節度使兗鄆濮徐隸河南節度登萊沂海泗  
隸淄青平盧元和十四年復置鄆曹濮三州節度使治鄆州  
十五年賜號天平軍馬總傳李師道平析鄆曹濮爲一道除總節度使賜號天平軍咸通五  
年增領齊棣二州十三年二州隸平盧軍曹州後隸宣武軍  
領鄆濮二州

### 泰寧軍

元和十四年置沂海觀察使領沂海兗密四州治沂州長慶  
元年升節度使治兗州李華傳華惡沂地福請治兗許之太和八年降觀察

使大中五年復故咸通三年增領徐州五年徐州隸徐泗團

練觀察使景福四年賜號泰寧軍

德滄二州隸義昌軍

開元十三年滄州置橫海軍使十八年廢二州隸幽州節度使上元二年二州

隸淄青平盧廣德元年二州隸魏博節度大曆十年滄州隸義武軍德州隸淄青平盧建中三年德州隸幽州節度旋隸成德軍貞元元年置德棣二州都團練守捉使三年置橫海軍節度使治滄州元和四年置保信軍領德棣二州治德州尋廢置二州團練守捉使紡績穀貯五年廢以二州隸成德軍十三年棣州隸橫海長慶元年置德棣二州觀察使二年廢太和元年棣州隸淄青平盧三年罷橫海軍更置齊德節度使治德州尋廢旋復更號齊滄德節度使治滄州五年賜號義昌軍五代梁乾化二年晉人避諱改號順化軍後唐同光元年復號橫海軍

博澶二州隸天雄軍

博州初隸幽州節度上元二年隸滑衛節度廣德元年隸魏博節度澶州初隸

魏博節度太和三年隸相衛澶節度旋復故魏博後賜號天雄軍五代晉於澶州置鎮守軍博州隸承清軍

貝洛二州隸昭義軍

貝州初隸幽州節度上元二年隸滑衛節度廣德元年隸魏博節度旋隸洛相

節度洛州初隸澤潞節度廣德元年隸洛相節度洛相亦號相衛後賜號昭義軍五代晉於貝州置永清軍周降爲團練使洛州降團練又降防禦使

曹宋二州隸宣武軍

本河南節度後號宣武軍初治汴五代梁治宋州後唐改號歸德軍

徐州隸武寧軍

軍本徐泗濼節度使廢置不一後號武寧軍改號感化軍復號武寧軍

隋開皇初盡廢諸郡各縣皆直隸於州大業二年又改州爲

郡唐武德初又改郡爲州天寶元年又改爲郡乾元元年又

改爲州通典某州下皆云或曰某郡唐志州郡並載自是迄

宋州郡並通稱矣

舊五代史有稱貝州爲貝郡者稱改曹州爲散郡者竟不知貝爲清河郡曹是改節

度爲散州非改郡也

通考五代梁時滄德二州爲唐所有末年博貝二州爲唐所

取新唐志羈縻州李盡忠陷營州乃延昌師帶鮮信  
五州於青州崇懷二州於淄青神龍初乃使北道

宋京東東路京東西路又河北東路河北西路地

宋初削節度使權諸州皆直隸京師仍分道置採訪使後各路置安撫轉運提刑等使其轄兩路轉運者曰都轉運使若節度使第以爲有功宗戚大臣加銜與唐迥異矣

宋京東路唐河南道之東半也至道三年以兗曹青鄆密齊

濟沂登萊單濮濰淄十四州廣濟清平宣化三軍萊蕪監又應

天府淮陽軍利國監屬京東路熙寧七年分爲東西兩路以青淄濰登

萊密沂徐八州又淮陽軍爲東路鄆兗齊濮曹濟單七州南京爲

西路元豐元年以齊州屬東路徐州屬西路宋志誤作屬東路又詔轉運司

通治兩路之事以京東爲名提刑提舉仍分路元祐元年提刑亦不分路東西遂併爲一路其後仍分爲兩路 南京卽唐宋州宋立應天府號南京大中祥符七年自爲路熙寧五年屬京東西路

河北路雍熙四年分東西兩路端拱二年併爲一路熙寧六年再分兩路

九域志作二年

博德濱棣恩五州大名府滄州永靜軍

屬東路洺州屬西路

金山東東路山東西路又大名路南京路河北西路地

金山東路宋京東路也大名路宋河北東路也又分南京自爲路 山東之稱古或指關東言或指太行山東言不專指

今山東也唐末五代以來始專以齊魯爲山東

五代孫晟密州人江南野

史以爲山東人野史又以史虛白爲山東人陸游南唐書稱爲齊魯世家

宋史李迥傳爲濟州通

判高宗卽位於南京授山東輦運使以山東名地以命官自

此始

畢再遇傳建炎二年殿帥郭倪招撫京東山東按是時金已改宋京東爲山東而金之山東西路地不能盡宋

之京東西路地故以京東山東並言也

僞齊劉豫以東平府爲東京 金章宗泰和六年以尙書戶

部侍郎梁鎰行六部尙書事於山東又宣宗貞祐元年置山

東西路總管府於歸德府又四年以尙書右丞侯摯行省事

於東平又興定元年以元帥左監軍必蘭阿魯帶權參知政

事行省於益都又五年置招撫司於單州是年東平陷於元

蒙古綱

元史稱  
忙古

移行省於邳州又興定三年濟南權隸山東

西路

蒙古綱傳興定三年奏曰濟南介東西兩路之間最爲衝要雖與東平鄰接不相統屬緩急不相應乞權隸本

路且差近於益都從之。食貨志泰和六年十一月復許諸路各行小鈔山東西路則於東平大名府云云大名金自爲

路或權隸山東  
東墩再考

金分處猛安謀克於各路

皆其國人猛安千夫長也謀克百夫長也

兵志云貞元

遷都徙上京路斡論和尙胡刺三國公太保昂詹事烏里野

輔國渤海骨定遠許烈故臬國公勃迭八猛安處之山東其

可考之名曰忒黑河猛安 蘸谷謀克 移里閔斡魯渾猛

安 翁浦謀克 付毋温山謀克 劉僧安和二謀克

并見  
兵志

山東西路蒲底山孛兀魯河謀克

宗室完顏拜傳

山東西路徒毋



堅猛安

完顏齊傳

萊州不札土河猛安

徒單克寧傳

東平路三屯猛安

荆王守禮傳

山東西路三土猛安又益打把謀克

夾谷衡傳三屯土似卽三屯

東西路吾改必刺謀克

完顏合達傳

山東東路胡刺温猛安

世宗紀

山東東路合里哥阿鄰猛安

章宗紀承安五年改山東東路舊皇城猛安名曰合里哥阿鄰

○諸猛安謀克之名當皆其本國地名非山東地名也

今皆未詳其地統見於此

元都省山東東西道又燕南河北道地

元制以中書省統山東河東河北之地爲腹裏爲道八謂之

內道凡二十九路亦稱都省

元史世祖紀中統元年詔曰內立都省以總宏綱百官志行省

與都省相表裏餘志傳稱都省者甚多

今山東其山東東西道燕南河北道地

也元志燕南河北道肅政廉訪司駐真定東昌東平濟益三

路曹濮諸州皆屬焉其山東東西道

宣  
肅政廉訪

慰司惟益都濟

南般陽三路宣海一州屬之而續通考東昌東平濟宣三路

曹濮等州皆屬山東東西道今山東境內元屬燕南河北者

惟河間路之陵州及臨邑等數縣而已夫山東西道者東平

等路是也益都三路並無西路地宣慰廉訪二司皆兼西道

名官元時東昌路增立邱縣乃山東宣慰司入奏順帝時山

東行省守東昌是東昌路隸山東矣崔敬傳云王恪等往鄆

城招諭李秉彝田豐等皆悔過自新山東郡邑之復敬之策

居多鄆城濟宣屬是濟宣路屬山東矣或制有更改歟今姑

從續通考俟再考

元史選舉志鄉試行省一十一宣慰司二  
河東山東直隸省部路分真定東平大都

上都又云會試中選者東平等五人山東四人是山東道與東平等雖同屬都省而仍有分別東平等蓋統東昌濟寧及各直隸州言之

元初張榮爲山東行尙書省於濟南嚴實爲山東西路行省於東平李壇爲山東淮南楚州行省於益都至元三年罷順

帝至正十一年設分省於濟寧路十七年置山東行省普顏不花

傳至正十九年平章山東行省守禦益都是時有又設分省於陵州此條惟見崔敬傳百官志不載二十三年置膠東行省於萊陽縣二

十七年又以太保左丞相也速分省於山東與金之行省山

東皆一時權宜之制惟李壇在益都差久故益都沿革書之

餘統見於此州縣下不復書元初因金制設山東統軍使又改行樞密院文宗至順元年改

山東萬戶府爲都督府順帝至正八年改山東道宣慰使司  
爲都元帥府八年設元帥府於沂州十一年分元帥府於登  
州旋罷沂州帥府改立兵馬都指揮使司復分司於膠州十  
六年又分樞密院於沂州十八年又有山東行樞密院之設  
而治大都之潮州十九年又以察罕帖木兒爲山東行樞密  
院大抵兵興治軍無與民事若至正十六年於沂州設河南  
廉訪司則寄治之官與山東無涉亦附見於此州縣下不書  
○天子所居曰禁中出行則豹尾前亦曰禁中又稱省中漢  
書武五子傳江充入宮至省中壞御座掘地孔光傳不言溫  
室省中樹是也唐楊收謂漢制總羣官而治曰省元許衡曰  
中書之務不勝其煩然其大要在用人立法而已人法相維  
上安下順而宰執優游于廊廟之上不煩不勞此所謂省也  
此省字之義也或謂王莽祖名禁改稱省中考漢書嚴朱諸  
人傳云皇后父禁治賈捐之獄以爲漏洩省中語禁卽王禁  
非莽所改明矣後尙書省曰尙書臺晉文帝討諸葛誕鍾會  
裴秀以行臺隨此有行臺之始然是役也魏帝實親行晉懷  
帝時東海王越出鎮以行臺自隨實一時僭亂之制嗣後非  
大征伐不置事畢輒罷西魏廢帝時政在宇文氏猶嫌於逼  
上改行臺爲中外府見周書王悅傳唐書百官志武德初邊  
要之地有行臺有大行臺其官設尙書令一人僕射二人自

左右丞以下諸司郎中略如京師劉黑闥反設山東行省於  
洛州設官應輦下之半蓋其權至重也金史衛紹王紀大安  
初梁鏜請置遼東行省上曰無故遣大臣徒動人心可見行  
省之設本不得已之舉後因各路用兵紛紛並置元初都漢  
北滅金後卽因而不改亦以去和林太遠不得不然也迨徙  
大都亦遂仍之元史百官志行中書省置丞相一員平章二  
員左右丞各一員參知政事二員員外郎二員其領以臺臣  
者則曰行御史臺以外吏而同禁闈之名以平世而行亂邦  
之制且地方大吏簿書填委至煩至勞於省字之義尤覺未  
當明祖深知其非改爲布政司國朝因之無如稱說口熟  
甚至不曰行省直呼某省舉世沿襲而不知其非外國小  
部亦分其種落而以省名之亦足哂已爲考其源流附此

明山東布政司地初設山東行省洪武九年改

明山東兼統遼東都指揮司今山東非其全境也 明初平

燕京改北平府隸山東行省見洪武實錄北平以南皆隸山

東矣後旋立北平行省

國朝山東布政司

續山東考古錄卷之一

滄州葉圭綬子佩甫述

濟南府上

歷城縣

周齊灤邑鞍邑臺邑鮑邑平陵邑又譚國後入齊

譚史記齊太公世家作郊

誤路史云一作鄭與郊異戰國齊歷下邑

春秋桓公十八年公會齊侯於灤杜注灤水在濟南歷城縣

西句北入濟

寰宇記引作在齊州歷城縣西南按晉無齊州今本無南字

按灤自發源至

入濟僅十許里古灤邑疑卽今治後改歷下也

又成公二年及齊師戰於鞍杜注齊地通典謂在平陰按傳

壬申次於靡笄之下癸酉陳於鞍齊師敗逐之三周華不注  
鞍當在靡笄山東北且去華不注不遠縣西四里有鞍山通  
志疑在平陰者遠謂當在此從之

晏子春秋景公使田無宇致臺前錄以爲卽漢臺縣

鮑邑故城在東三十四里寰宇記引三齊記云鮑叔牙所食  
之邑又隋志厯城有鮑山

說苑桓公之平陵水經注關蘆水西北流至平陵城與武原  
水合水出譚城南北逕譚城東又北逕平陵縣故城西又北  
逕巨合城東合關蘆水或據此謂古平陵與漢縣是兩城余  
謂二水皆逕平陵城西而合流耳而魏志平陵肥鄉皆有平



陵城或古城分隸兩縣歟

譚國故城在東八十里又名有城

見水經注

詩譚公惟私春秋莊

公十年齊師滅譚杜注在平陵縣西南

舊說以縣爲譚國

按縣治去譚八十里齊未滅譚之前已爲齊樂邑譚齊邦域  
中小國西境恐不能如許大也濟南郡治東平陵實譚地迨  
徙治厯城相沿不察耳

史記晉平公九年伐齊戰於靡下徐廣曰當作厯又齊王建  
四十年秦兵次於厯下余謂厯靡字訛也卽漢厯城縣

漢青州濟南郡治東平陵縣初爲濟南郡屬齊國呂后元年屬

呂國

史記齊悼惠王世家割齊濟南郡爲呂王奉邑又齊舉兵攻呂國之濟南據此知漢初已有濟南郡特不屬王朝耳

泰山城陽東海等郡並同此

文帝元年還屬十六年分齊置濟南國景帝漢志

在二年史記表在四年王念孫曰當作三年

除爲郡又歷城縣臺縣兗州泰山郡奉

高縣地

魏志奉高有玉符山又西南境當有茌縣地

後漢復爲國永興元年爲郡王廣

卒後

熹平三年復爲國魏爲郡正始七年復爲國

任城王楷徙封此臺

縣未詳省否

東平陵縣故城在東北七十五里路史作平陸縣誤

歷城縣故城卽今治西南隅水經注灤水出歷

脫城字

縣故城

西南城南對山其水北爲大明湖湖水引瀆入西郭東至歷

城西而側城西注又云湖水

此歷水陂今大明湖

上承東城歷祠下泉

源競發北流逕歷城東又北引水爲流杯池州僚賓燕公私

多萃其上

卽今撫署內濯纓湖

歷水分爲二水右水北出左水西逕歷

城北西北爲陂謂之歷水陂與灤水會自水枝津合

此句似有脫文

以上下文推之當是右水支津與左水合而北也

水首受歷水於歷城東東北逕東

城西而北出郭按灤水源卽趵突泉寰宇記舜井在歷城縣

東百步卽今南門內舜井歷水陂在縣城北觀此古縣城在

今城西南隅其四至約畧可知矣但縣城之東又有東城寰

宇記四望湖在縣西二百步其水分流入縣城至街中與孝

感泉合流入州城蓋州城卽東城宋初猶有兩城也歷水出

郭之處卽今會波門下知今之城卽古之郭東城疑西晉末

移郡時所築否則劉宋青冀二州同治時築易郭爲城當在

宋金之際矣

臺縣故城在東北八十許里漢志作平臺辨誤見前錄

寰宇記譚

城在縣東南一十五里臺城在縣北一十三里皆承上廢全節縣言玉海齊乘誤縣爲厯城今乾隆志仍沿其誤紀要疑臺城一十三里太近妄改作三十里愈繆

晉志青州後云魏平蜀徙其豪將家於濟河北爲濟岷郡據

此是濟岷郡乃魏末置非晉置也劉宋志云濟岷郡義熙中

土斷并濟南齊乘考證曰蓋以今濟南北境僑置非改濟南

爲濟岷觀宋志云并不云改可見按郡治領縣皆無考故不

書

晉書載記趙王虎八年晉濟岷太守劉闡叛害下邳內史夏侯嘉以下邳降蓋青州沒後又僑置於下邳者

晉青州濟南郡治東平陵縣泰始元年濟南復爲國咸寧三年

復爲郡 王耽徙對中山後以濟南郡益齊國旋復故 又厯城縣永嘉末移郡治厯城

又兖州泰山郡奉高縣地

晉志濟南郡領平壽下密膠東卽墨祝阿五縣考魏志平陵

厯城著三縣並云晉屬濟南元和志濟南郡晉永嘉亂後移

理厯城若鄒平於陵菅潔陰四縣皆晉濟南所有魏志平壽

下密膠東並云晉屬齊卽墨晉屬長廣蓋志脫去東平陵等

縣誤將齊屬錯出於此也 長廣郡本漢末置後罷晉武復卽墨魏已屬長廣疑晉初長廣未置

之前會齊乘不察謂晉濟南治平壽改漢之濟南爲濟岷非

是 補東晉志知晉志脫誤據魏志等補入東平陵等縣最當其補十六國志有與所補東晉志同者有仍晉志之誤者

殊不 合 魏志平陵二漢晉曰東平陵後改元和志宋省東字

後魏爲東陵寰宇記後魏又加東字皆不合考杜預已稱平陵或晉已省東字也

劉宋青州濟南郡治厯城縣

劉宋志作廣城筆誤

孝建二年移州來治大

明八年還治臨淄之東陽城又平陵縣兗州泰山郡奉高縣地

元嘉九年僑置冀州及魏郡於厯城又僑置聊城縣肥鄉縣又

臨邑縣地

魏志東魏郡臨邑有鵠山在今縣北十五里未詳何代析入縣

後魏皇興三年改僑

冀州爲齊州僑魏郡曰東魏郡孝昌三年移郡治故臺城

後魏平陵縣故城在東北七十里今城子莊疑劉宋徙也

魏志東魏郡聊城有臺城管城蓋於漢臺管兩縣地置縣治

未詳在縣或章邱姑係此俟考

又肥鄉有平陵城巨合城

今龍山鎮

一統志肥鄉在厯城東

紀要臺縣晉省劉宋復置爲東魏郡治後魏因之魏志東魏

郡治臺城後遷厯城是也又引寰宇記後魏孝昌三年濟南

郡移治臺縣齊天保中始遷厯城按此大繆劉宋並未復置

臺縣宋魏時臺城自爲聊城地

通典聊城有臺城又混僑縣於實土

魏移東魏

郡治故臺城魏志云東魏郡治厯城後徙臺城非自臺城徙

厯城也寰宇記引三齊記曰高唐縣西南四十里有臺城其

間空廢

此句下非三齊記語

至魏孝昌三年馬日珍移郡入焉齊天保

七年改爲濟南郡還入厯城按魏孝昌三年移東魏郡治臺

城非移濟南郡齊并東魏郡入濟南郡非改濟南郡如移臺

者爲濟南郡何又云齊改名濟南耶樂氏本未明了顧氏愈重其繆

高齊齊州治濟南郡治厯城縣又平陵縣及衛國縣地天保七年廢東魏郡入濟南廢聊城入平陵廢肥鄉入衛國宇文周省

平陵縣

齊奉高南徙今厯城南境齊周當與隋同

大象元年以郡爲陳國

隋齊州

郡治厯城縣及章邱縣地亭山縣地

卽衛國改

開皇初廢濟南

郡十六年置營城縣大業二年改齊州爲齊郡省營城入章邱

省山荏縣入厯城又

兗州魯郡

博城縣地

隋志博城有玉符山此山今縣志不能確指據水經

注爲玉符水所經水卽縣南三錦川也在縣境無疑齊乘疑爲方山又疑爲長清之靈岩山方山近是未詳何代析入厯城

營城縣故城在東三十里元和志厯城縣引述征記曰厯城



到營城三十里寰宇記厯城縣引三齊記云厯城縣東四十

里有營城

其又稱在縣西二十七里者亦蒙廢全節縣爲文也乾隆志稱在厯城縣西三十里誤

按述

征記三齊記二書皆在隋前營城之名已久劉宋起居注平原郡徐爰國史州郡志南東平郡皆有營城縣漢書功臣侯表趙充國封營平侯下有濟南字又王子侯表齊悼惠王子營平侯信史記表無平字舊說謂卽此營城蓋本鄉亭侯城劉宋名僑縣隋因置縣也前錄謂隋唐皆置管城縣而唐志訛作營余按隋志亦作營似非訛字紀要亦以營城爲管城而反疑述征記爲誤今不從

唐河南道

齊州  
濟南郡

治厯城縣武德元年改齊郡爲州二年於後

魏平陵城復置平陵縣并置譚州又復營城縣八年廢營城入平陵貞觀元年譚州廢來屬十七年改平陵爲全節天寶元年改齊州爲臨淄郡五載復名濟南郡乾元元年又改齊州元和十年廢全節入厯城五代因之

唐復置山莊詳長清。唐省亭山入章邱巨合平陵城入縣境

寰宇記廢全節縣漢爲東平陵縣地理志云在今縣東南平

陵城是也是唐於後魏平陵城置縣非漢城也元和志全節

縣本是隋末土人李滿

一作蒲

率鄉人據堡武德二年歸國蓋

周省平陵李滿保聚於其故城耳齊乘厯城縣隋唐州郡

並理東平陵後改全節元和後省全節入厯城始爲郡治焉

又云東平陵城厯代皆爲縣宇文周始廢隋亂土豪李滿據

城歸唐武德二年置譚州平陵縣又云此城漢爲王都唐爲  
州治按唐全節並非東平陵城晉永嘉後郡移厯城迄隋唐  
並未復治平陵安得謂唐爲郡治全節廢始移厯城乎蓋于  
氏誤於晉改濟南爲濟岷郡遂以濟南郡治厯城加之唐廢  
全節後舛繆極矣 續通考唐省平陵入厯城按省時名全  
節

宋京東東路濟南府濟南郡興德軍節度治厯城縣治平二年  
賜軍號政和六年升府

金山東東西路提刑司治山東東路濟南府治厯城  
元都省山東東西道廉訪司治濟南府治厯城縣宣慰司初治

此至元二十四年移治益都路

明山東布政司治濟南府治歷城縣洪武元年設山東行省九年改布政司又爲按察司治附初設都指揮司於青州府後來治又置濟南衛

國朝山東布政司治濟南府治歷城縣又爲山東巡撫治按察司治濟東泰武臨道治 雍正三年裁都指揮司 裁衛

縣志

乾隆三十六年修知縣胡德琳

沿革漏載齊濼邑

章邱縣

周齊甯邑崔邑賴邑

甯邑故城在東北二十五里寰宇記章邱縣甯城齊爲邑甯

戚食邑於此又云甯戚城在縣東北三十里漢武帝封魯共王子恬爲寧陽侯按漢書功臣侯表有甯嚴侯魏邀卽此城寧陽在今寧陽縣南此非是齊乘又訛作寧陵

崔邑故城在西北七十里今土城春秋襄公二十七年左傳崔成請老於崔杜注濟南朝陽縣西北有崔氏城

春秋哀公六年左傳胡姬以安孺子如賴杜注齊地又十年傳晉趙鞅伐齊侵及賴而還後漢志菅縣有賴亭劉昭注引哀六年傳誤作公如賴當在縣西北

後漢建安末封曹幹爲賴亭侯卽此見三國志

漢青州濟南郡陽邱縣土鼓縣菅縣獠縣又東平陵縣地朝陽

縣地

崔城

陽邱縣故城在西北七里又名章邱城

見水經注

今回軍鎮寰宇

記稱在縣南十里其時縣治黃巾固也

紀要在今縣南十里大謬

土鼓縣故城在東南二十里今明水鎮東

舊唐志以臨濟爲漢管縣通典以爲漢朝陽考朝陽城不在

此詳齊東

水經注濟水逕管縣故城南在臺縣後納百脈水前

元和志臨濟縣濟水在南二十里今臨濟鎮在臺城東繡江

西卽百脈水

禹貢錐指以爲卽管城說自可從縣志謂卽縣北三

十里管家廟其地在百脈水東疑非是

紀要引述征記歷

城到管城三十里而疑其誤不知述征記所載乃管城非管

城通志管城在臨濟鎮北無據

寰宇記臨濟本漢管縣

地引晉地志云管叔後又封於此城齊滅管故其子孫仕齊  
按兩漢志皆作管應劭音姦史記景惠侯者表作管管晏列  
傳管仲子孫世祿於齊有封邑者十餘世仲有大功於齊食  
邑穀之外又有駢非一邑可知仲與叔牙爲貧賤交此地近  
鮑城則謂管叔後復封未必然或爲管仲故居未可知也

蘇林曰東朝陽有貌亭

應劭音貌蘇林音又貌  
謨音由師古曰貌音是

今縣西北十

五里有古城縣志以爲古貌城北去朝陽城不遠姑從之

後漢青州濟南郡土鼓縣管縣又東平陵縣地東朝陽縣地魏  
因之晉省土鼓縣

魏志土鼓晉罷知魏未罷也晉太康志有管縣不獨知晉有

魏亦有也補三國志魏無土鼓補東晉志無管縣而附見太

康志設於後皆未合

三國志司馬芝傳魏太祖平荊州以芝爲管長卽管也洪氏漏引

劉宋僑冀州平原郡高唐縣廣宗縣魏郡博平縣蠡吾縣頓邱

縣及聊城縣地

有管城

肥鄉縣地

本平陵東境

又頓邱郡頓邱縣衛國

縣又青州濟南郡土鼓縣地縣治移今淄川境

魏志土鼓有龍盤山

平陵

縣地

魏志平陵有章邱城洛盤城

朝陽縣地

後魏齊州東平原郡高唐縣廣宗縣東魏郡博平縣蠡吾縣頓

邱縣衛國縣及聊城縣地濟南郡土鼓縣地平陵縣地朝陽縣

地

劉宋僑高唐縣故城在西北二十里古黃巾固城今水寨寰



宇記章邱縣卽古黃巾城水經注百脈水逕陽邱城中西北

出逕黃巾固蓋賊所屯故因得名元和志章邱縣高齊天保

七年自高唐故城移高唐縣理於此按宋伏琛三齊記稱高

唐縣西南四十里有臺城

卽漢臺縣城

則宋魏僑高唐縣已治此

高齊移禹城境內之高唐於今高唐州東南之莒城李氏混

質土徙治於僑縣繆矣

續通典齊州章邱縣古高唐春秋

戰國之時爲齊邑故城在廢禹城西四十里按旣知故城所

在章邱縣何須牽入 齊乘以黃巾城立章邱縣誤

僑廣宗縣故城在東南四十里文祖鎮北俗曰陰城魏志廣

宗有平郭城有胡山胡山在東南四十許里又縣東南 十

里孤山南有古城址卽平郭城

僑博平縣故城在東南三十里今博平鎮魏志博平有土鼓城逢陵城長白山蓋漢土鼓於陵兩縣地

魏志蠡吾有龍山縣治未詳

歷城志亦載之

縣西南五十里雞山西有東西南三村皆名頓邱俗訛頓首莊蓋劉宋兩縣治一郡治後魏併作一縣也

僑衛國縣故城在西南五十里

雞山圖東

魏志衛國有雞山元和

志亭山縣西北至州九十里宋於此置衛國縣開皇六年改爲亭山縣東南有亭山因以爲名寰宇記章邱縣平陵王墓在縣東北二里墓在危山之頂又云雞山在縣西十里晏謨

齊記曰衛國縣西有雞山按危山在縣西南四十里雞山在縣西南五十里樂氏所載皆亭山縣未省前地志原文所謂縣指亭山非指章邱觀所引晏記可證然則衛國城在危山西南二里雞山東十里今縣西南四十里也 紀要宋置衛國縣後魏廢北齊復豈未見魏志耶

高齊齊州東平原郡高唐縣濟南郡衛國縣天保七年省土鼓肥鄉入之又平陵縣地周因之

周無平陵縣

隋齊州章邱縣亭山縣臨濟縣開皇六年改衛國爲亭山又置

朝陽縣十六年

元和志作十八年

改高唐爲章邱又改朝陽爲臨濟大

業二年省營城縣入章邱

隋臨濟縣故城在西北六十里今臨濟鎮

唐河南道

齊州濟南郡

章邱縣臨濟縣武德元年於臨濟縣置鄒州

章邱亭山屬譚州八年廢鄒州臨濟屬譚州貞觀元年三縣來

屬元和十五年省亭山入章邱

唐復營城省入平陵

唐省營城入平陵平陵改全節又省入

厯城則營城全節及譚州廢置皆當係厯城下舊唐志厯城下唯載全節其營城譚州皆係章邱下新唐志厯城下概不之及

似未當

縣東南境當有萊蕪縣地詳雜考

五代因之

唐書房元齡齊州臨淄人後封臨淄郡公按唐初無臨淄郡

臨淄縣亦不屬齊州通志以爲元齡本章邱人後又徙臨淄

然則當云青州臨淄何得繫之齊州且安所得臨淄郡乎今

考章邱西少南三十里趙山下有元齡父房彥謙墓其地北

去隋臨濟縣故城不遠隋無平陵縣趙山當卽臨濟地或居  
在臨濟稍南葬於亭山地皆未可知而元齡爲齊州臨濟人  
傳寫訛作臨淄則無可疑也唐初盡改郡爲州而封爵則必  
稱郡公不稱州公臨濟縣爲鄒州治遂以縣名名郡以封元  
齡前史臨濟臨淄往往互訛近志青州人物亦載元齡未之  
考也 元齡先本清河人彥謙爲濟南郡臨濟人元齡入唐  
爲鄒州臨濟人武德八年爲譚州臨濟人貞觀三年爲齊州  
臨濟人宋時臨濟始省入章邱志稱元齡爲章邱人亦非是  
宋京東東路濟南府濟南郡章邱縣咸平四年省臨濟入之爲  
鎮景德三年置清平軍縣屬之熙寧三年以縣兼軍使仍來屬

清平軍故城在北十五里今舊軍鎮齊乘章邱縣宋景德三年移縣北置清平軍縣屬焉熙寧三年復移軍使於縣城金廢軍縣屬濟南按據此似縣移軍城後復還縣城者考宋志熙寧三年清平軍廢卽縣治置軍使似軍與縣初非一城也且軍使不專設以縣令兼之亦不得云移軍使於縣城宋志逕云軍廢亦稍誤宋縣已還屬濟南非金改屬特軍號金始廢耳續通考濟南無章邱縣蓋宋舊地志章邱自屬清平軍因此脫載

金山東東路濟南府章邱縣

元都省山東濟南府章邱縣

元章邱縣卽今治齊乘厯城縣沿革引述征記云厯城到營城三十里自城以東水瀰漫數十里間南則迫險實爲險固

以上皆元和志

引述征記語

逮金亂土人因阻水立邑號曰水寨歸附後

移置今縣按營城無水寨之名厯城無治營城元初移今縣之事章邱縣北二十里有水寨卽古黃巾城元和志章邱縣東陵山在縣南二十八里寰宇記女郎山在縣南陽邱城在縣南十里水寨與此無不吻合是土人因亂自保其邑元初徙今縣皆章邱縣事于氏因述征記營城有水瀰漫數十里之說遂牽混於水寨之名而誤係之厯城耳不然厯城爲金元以來府路司省倚郭大邑如曾保營城元初還故治豈諸

史諸志無一語及之乎 通鑑胡注黃巾固在章邱縣北胡  
身之元初人又于氏稱清平軍在縣北縣爲元初所徙無疑  
明山東布政司濟南府章邱縣

國朝因之

縣志

道光十三年修  
知縣吳璋

以今治爲齊所徙之高唐而力駁徙

黃巾固之說考東陵山在今治南十里女郎山在城北陽  
邱城在今治西北七里核以元和志寰宇記所載則舊治  
在黃巾固尙待問哉 舊唐書地理志厯城注云舊志有  
平陵縣非也自元魏以平陵入肥鄉北齊又以肥鄉入衛  
國又以衛國入亭山皆在章邱地至唐以李義滿來降始



復置平陵後改全節又省入厯城自此之後章邱始無平陵厯城舊志安有平陵哉按此論繆極魏志肥鄉有平陵城乃析平陵東半置其時自有平陵縣何嘗省入肥鄉繆一亭山卽衛國乃云衛國入亭山繆二周省平陵唐復置舊志有平陵此未改全節前舊地志並非厯城舊志繆三夫宋魏以前東平陵與陽邱等縣並置析置肥鄉爲肥鄉地省入衛國改亭山爲衛國亭山地其西半自漢至齊自爲平陵縣惟周隋之世隸何縣無考唐初又自爲縣後并入厯城但因亭山故城在章邱遂謂厯城無平陵地夫唐以前厯城固無平陵地唐以後平陵城却在厯城若章邱

第有平陵東境平陵城從未屬之謂唐以前爲章邱地可乎 水經注武原水又北逕東平陵故城西濟南治也漢文帝十六年置爲王國景帝二年爲郡其水又北逕巨合城東漢武帝以封成陽項王子劉發于爲侯國齊乘云東平陵府東七十五里文帝時齊悼惠王子辟光爲濟南王都此此承寰宇記之誤寰宇記齊州下云文帝分齊郡立濟南國今州卽濟南國之厯城縣理所景帝三年爲濟南郡理東平陵屬青州晉永嘉末自東平陵移理厯城今州理是也

此全本元和志

按志

漢書王子侯表鉅合侯劉發在平原

項王子二十二人表止十九人無封平陵者劉發于並無

此名見史記索隱又考史漢表中並無文帝十六年以東平陵置爲王國語辟光封濟南王亦無都平陵語寰宇記所云理東平陵在景帝二年辟光以反誅改郡之後是濟南國不得謂之東平陵國水經注齊乘語未核余按此直句讀不知而強作解事者水經注置王國句上承濟南郡治來仍立濟南王國非平陵王國也寰宇記東平陵句雙承上文立國改郡來今州云云乃謂今州理卽濟南郡所屬之歷城縣理非謂國本治歷城改郡後始移治東平陵也酈注劉發于爲侯國乃指巨合城何嘗謂封東平陵乎于字偶衍不足爲疑文帝十六年云云載在班書地志謂

史漢無其文可乎

巨合城卽今龍山鎮表下注平原別有義例詳雜考

駁鄒樂于三

家而三家並無一誤所駁語反無一不誤北齊承元魏

之後所得者元魏之疆域宋之衛國在江左土鼓肥鄉在齊郡相距數千里無從併入隋書亭山舊曰衛國以魏爲舊非以宋爲舊也余按此竟不知青州於東晉未復入江左盡觀宋志

### 鄒平縣

### 古鄒國周齊鄒邑

水經注漯水逕鄒平縣故城北古

一本鄒侯國舜後姚姓作有

晏子春秋景公爲鄒之長塗縣志謂漢鄒平梁鄒東鄒三縣

地皆是從之

漢青州濟南郡鄒平縣梁鄒縣千乘郡東鄒縣

東南當有於陵縣地

鄒平縣故城在北四十里今孫家鎮

九域志鄒平有孫家鎮蓋景德徙治後改也

漢志作鄒辨誤詳前錄

梁鄒縣故城在東北二十里今舊口鎮

東鄒縣故城在東北六十里今花溝鎮

後漢青州濟南郡鄒平縣梁鄒縣魏梁鄒未詳何屬晉咸寧初  
梁鄒屬樂安國

晉志無鄒平梁鄒二縣二縣實晉所有考詳前錄 補三國

志樂安有鄒縣自注卽漢東鄒蓋晉志樂安有鄒縣也齊乘

考證云晉時縣名多沿漢舊按何曾傳曾孫機爲鄒平令解  
系傳父修封梁鄒侯是有鄒平梁鄒矣宋書亦言晉太康六  
年三月樂安梁鄒等八縣隕霜傷桑麥不知何故晉書地理  
志樂安國下單書一鄒字此史文之闕而齊乘謂首省梁鄒  
入鄒縣晉以前此地本無鄒縣而何從入之乎余按晉書安  
平王鑒傳咸寧初以齊之梁鄒益封樂安國則地理志樂安  
之鄒卽梁鄒疑魏改屬齊也東鄒後漢省洪氏殊尖考

劉宋僑冀州平原郡治

鄒故城

當爲平原  
僑縣地

又樂安郡臨濟縣

地

魏志臨濟  
有鄒平城

幽州僑置於平原郡

魏志東平原郡劉裕置魏因之治梁鄒按宋魏皆無梁鄒縣

當云治梁鄒城 宋明帝泰始三年幽州刺史劉休賓守梁  
鄒蓋是時沈文秀刺青州崔道固刺冀州假幽州以爲號非  
又僑立幽州於此也南齊書王元載傳宋泰始初遷清河廣  
平當作二郡太守幽州刺史同此

後魏齊州東平原郡治梁鄒故城

當亦爲平原  
原僑縣地

又平原縣及臨濟

縣地

後魏僑平原縣故城在東十二里今平原莊魏志平原有黃  
山在今城東南

高齊齊州東平原郡平原縣天保七年移郡治於廣川郡城

詳長

山因移縣治於梁鄒故城周因之

寰宇記高齊天保七年自今長山界內濟南故城移平原縣

於今理東南三十五里之漢梁鄒故城

三十五字爲一  
句今理指孫鎮按平

原莊唐宋屬長山也特隋始於此置濟南縣北齊時無此稱  
通典括地志皆誤以此城爲濟南郡城樂氏誤因此通典又  
稱此城在長山西北據元和志知唐人誤謂隋濟南縣置於  
梁鄒城也

隋齊

州郡

鄒平縣又長山縣地開皇十六年置濟南縣於後魏平

原縣城十八年改平原爲鄒平省濟南縣入長山

隋鄒平縣卽漢鄒平城開皇三年徙平原縣於此十八年改

唐河南道淄

州郡

鄒平縣及長山縣地高苑縣地武德元年屬



鄒州八年屬譚州貞觀元年來屬景龍元年於梁鄒城置濟陽縣同屬元和十年省入高苑五代因之

武德二年

至

七年鄒平縣故城在西北

里

漢鄒平城西  
南十五里

又名趙臺城今稱步王臺 八年遷治漢鄒平城 通鑑胡

注漢梁鄒城在唐齊州臨濟縣界按此因唐高苑爲後漢以來臨濟縣地不知唐臨濟非故地也 齊乘廢濟陽城在高

苑縣北九十餘里此本寰宇記在州北九十四里誤淄州爲高苑縣據元和志濟陽縣東南至州六十四里寰宇記方向里數皆未核齊乘考證以爲卽今縣治則沿禹貢錐指之誤

宋京東東路淄

州

鄒平縣又長山縣地高苑縣地

宋鄒平縣於景德元年徙漢梁鄒城

金山東東路淄州鄒平縣

金鄒平縣卽今治金翰林學士邑人劉仲元上書堂記云傍鄒皆山也黃山時其東聖王諸峯委會於其西與今形勢合是金已徙今治通志云宋宣和末金人要宋伐遼徽欽命民間修築自爲保障乃移今治備考

元都省山東濟南路鄒平縣

明山東布政司濟南府鄒平縣

國朝因之

縣志

道光十六年修知縣羅宗熾

方域考晉鄒平屬樂安郡此以晉志

樂安鄒爲鄒平也非是 宋梁鄒升爲郡則郡之所隸卽  
梁鄒疆域所屆按此殊否平原高二縣漢高苑地廣宗漢  
土鼓地安得皆在梁鄒域內乎 古蹟魏臨濟無考按此  
臨濟在今齊東 引水經注誤以蓋野溝水所逕作時水  
支津所逕

### 長山縣

周齊夫于邑戰國於陵邑

夫于邑在西南三十里今夫村春秋昭公十年左傳陳桓子  
召于周而與之夫于杜注濟南於陵縣西北有于亭

孟子陳仲子居於於陵按卽漢縣 路史於陵商侯國

漢青州濟南郡於陵縣千乘郡高宛縣

西北當有梁鄉縣地

於陵縣故城在南二十里今古城

高宛縣故城在北二十里今宛城店又名西高宛城

五詳新城

後漢青州濟南郡於陵縣樂安國高苑縣魏晉因之東晉義熙中僑置廣川郡並置廣川縣爲郡治

晉志無於陵誤

詳歷城

紀要於陵晉改曰烏陵旋廢按據杜預

二云見上及寰宇記長山縣自漢至晉恒爲於陵縣地之說是

晉未改名亦未廢也劉宋永初時猶有於陵非晉廢矣顧氏意東晉僑置廣川郡縣於此故云然耳烏知非並置乎

僑廣川縣故城卽今縣治

詳下

劉宋青州濟南郡逢陵縣僑冀州廣川郡治武強縣宋分廣川縣置武強縣又省廣川入之郡治如故又平原郡平原縣高縣魏郡安陽縣魏縣

僑武強縣故城在東十五里今故縣村俗訛通志云廣川郡

城在縣東十五里宋宣和末移今治縣志則據元至正十二

年牛學重修城記云長山城其始築之世獨有縣解壁刻云

東晉劉裕以爲武強鎮武強未立鎮至北齊置東平原縣當

郡及隋改立今名唐宋五代宋金以至於今皆因之又云宣

和之末金人要宋伐遼土宇崩蕩民間相率築堡修城金長

夏區歲久城壞屬我朝興朔徼也中土大震至煩再築據此

則自隋以來長山城卽今治金人再築非宋人徙築也余按兩說互異而是非各半考寰宇記云宋武帝僑立廣川郡又於郡理立武強縣高齊天保七年改爲平原郡隋開皇三年郡廢乃移武強縣於廢郡城中夫旣云於郡理立縣則縣治卽在郡城又云廢郡始移縣於郡城則郡城外當別有縣城唐房彥謙碑有云宋於東廣川郡別立武強縣別立者別乎郡城而立縣也通志謂卽故縣村是也但以爲廣川郡城則非此縣爲宋所立之武強則晉末所立之廣川縣不在此城縣志謂卽今治亦是也但以爲武強縣則非蓋宋初未分廣川別立武強縣旋省廣川入之而郡治如故隋廢郡始移縣

入焉樂氏謂於郡治置縣定有所本但誤以爲武強故不載  
省廣川入武強事以致自相矛盾然非此文及房公碑直無  
從考其建置移徙之實矣

逢陵當是宋初分於陵置永初郡國二縣並有可證魏志逢  
陵有於陵城蓋永初後并入而博平下又有逢陵城或古城  
歟抑宋縣歟考寰宇記淄川縣逢陵故城在縣關四十里左

傳云齊大夫逢丑父與君易位此爲丑父之邑此或卽博平  
所有當在淄川西北也或曰卽宋魏逢陵縣治俟再考 紀  
要引魏志逢陵治於陵城與汲古閣本不同齊乘引水經注  
楊緒溝水出於陵西南作出逢陵西南未知所見何本

魏志高縣有平原城則劉宋縣矣亦古高苑地

後魏青州濟南郡逢陵縣齊州廣川郡治武強縣

郡治同宋

東平原

郡高縣東魏郡東魏縣安陽縣

魏志高縣有高苑城鄒平志云高卽治漢高苑城高苑本有

東西二城也

又東魏縣有獐山出錫有蒼浪溝時水接蒼浪溝今鄭黃溝

時水是時支津今縣東北烏河

又安陽縣有魚子溝卽今縣南泔溝

縣南接淄川有高店莊或宋初所置後又移黃巾固城歟再

考



高齊齊州東平原郡治武強縣天保七年廢廣川郡移東平原

來治

仍治故郡城

周因之

寰宇記齊天保七年改廣川郡爲平原郡隋志長山舊曰武強置廣川郡併東清河平原二郡改曰東平原郡通鑑胡注清河郡置於盤陽據魏志宋郡也五代志長山之平原清河雙頭郡也或據此謂武強並置清河平原二郡故名雙頭如并三郡爲一東平原郡何以稱雙頭郡乎余謂雙頭二郡共一太守耳

隋齊

州郡

長山縣開皇三年廢東平原郡十八年改武強爲今名

大業初省濟南縣入之

見鄒平

長山縣卽廢郡城開皇三年廢郡移縣治之

詳前

唐河南道淄

州郡

長山縣武德元年屬鄒州八年屬五代因之

宋京東東路淄

州郡

長山縣

今治非宋宣和徙固已或據九域志長山在州北五十五里  
謂縣猶治故縣村則宣和徙治未必竟非但元和志作六十  
四里寰宇記作六十二里是唐及宋初又與今畧同則古今  
計里大小不同稱說各異耳不足爲疑

金山東東路淄州長山縣

元都省山東般陽路長山縣至元十九年析置新城縣

元志長山下云本屬濟南考長山本淄州屬元初淄州會隸

濟南長山隨州屬之耳

明山東布政司濟南府長山縣

國朝因之

縣志

嘉慶六年修  
知縣倪金望

古蹟旣以廣川郡城爲今治於陵城條

又以爲宋移今治且係於於陵城尤繆 濟南縣城在西

三十五里舊口東此沿元和志之誤以梁鄒城爲隋濟南

縣城也